

# Engler s'infurmescha pertutgant il center da sport

Cussegl dals chantuns – promoziun da sport d'elita e per giuvenis

■ **(anr/vi) Events da sport ed il sport d'elita duai la confederaziun promover pli ferm en l'avegnir. Quai ha decidì ier il cussegl dals chantuns cun 40 vuschs senza cuntravuschs. Stefan Engler (pcd/GR) ha dumandà suenter il center da sport planisà.** Da nov candidaturas per in center naziunal da sport d'enviern ha Lai cuntanschì dacurt ils pli blers puncts da l'uffizi da sport. S-chanf sa chatta sin plaz trais, Tavau sin plaz sis. Il center da sport n'era ier atgnamain betg tractandà, ma cusseglier federal *Ueli Maurer* l'ha menziunà durant la debatta. Cussegl dals chantuns *Stefan Engler* ha prendì la chaschun per il chavez ed ha tschentà «duas simplas dumondas».

Co è l'urari pertutgant il center da sport planisà? Vegnan ponderaziuns objectivas – pia la qualificaziun – ad esser decisivas per la schelta dal lieu?

## Politica regionala gioga er ina rolla

L'uffizi da sport proponia al cussegl federal in lieu tenor criteris objectivs, ha ditg Maurer. La qualitad da las candidaturas saja dentant pouca letga. Sper criteris objectivs vegnia perquai era la politica regionala a giugar ina rolla. La decisiun prendia il cussegl federal ed il parlament.

Suenter la debatta è Engler sa mussà cuntent che l'uffizi da sport sa basia sin criteris objectivs. Uschia haja il Grischun las meglras cartas da vegnir proponì da l'uffizi da sport. Pli tard, tar la decisiun en il cussegl federal ed en il parlament, saja il Grischun dentant en stretga concorrenza cun ils auters lieus. «Perquai fai da basegn che nus faschain lavur da lobby en ils chantuns da la Svizra orientala», ha ditg Engler a l'anr.

## Moziun per promover il sport

Tematica principala en il cussegl dals chantuns era dentant la promoziun dal sport d'elita e per giuvenis e dad eveniments da sport. Sco segunda chombra ha

il cussegl dals chantuns approvà ier la moziun da la cumissiu dal cussegl naziunal.

En sazez fuvà la promoziun gia fixada ensemen cun la candidatura per ils gieus olimpics 2022. Ils votants grischuns han dentant refusà avant in onn la candidatura. La moziun ha perquai già la finamira da tuttina segirar ils aspects da la promoziun.

En sia resposta da l'onn passà aveva il cussegl federal anc refusà la moziun. La lescha da sport porschia gia ina basa sufficiente per far promoziun. Ils daners necessaris possian ins lubir cun il preventiv. Il minister da sport Ueli Maurer ha ier

dentant dà d'entellir cleramain ch'el beneventia tuttina in «gea» a la moziun.

## Flaivel: la scolaziun da trenaders

Il minister da sport ha plinavant skizzà tge che funcziuna da preschent bain e tge mender en la promoziun. Sco puncts positivs ha enumerà Maurer «Giuventetgna e sport» che retira trais quartas da las subvenziuns e che promova 75 sports cun 600 000 giuvenils. Era la scol'auta ed ils indrizs da Magglingen e Tenero marschian bain. Là veglian ins era en l'avegnir promover il sport d'elita.

Pli flaivela saja la promoziun da sport

d'enviern. Ma cun ils centers da sport d'enviern planisads duain ils giuvenils puspè pratitgar a moda favuraivla il sport da naiv - era per chattar novs talents. In ulteriur punct flaivel saja la scolaziun dals trenaders en Svizra che saja sin nivel fitg bass en cumparegliaziun internaziunala. Ils trenaders stoppian era savens era lavurar quasi gratuit.

Sco ultim ha Maurer accentuà ch'il sport d'elita saja ina buna motivaziun per il sport popular. Las victorias da Dario Cologna chaschunian in boom da passlung. «Igl exista pia in equiliber tranter il sport popular che nus sustegnì ed il sport da talents ed il sport d'elita.»



Events da sport ed il sport d'elita duai la confederaziun promover pli ferm en l'avegnir.

KEYSTONE

## Cupitgarola per il di da sport d'enviern

La confederaziun na duai betg sustegnair finanzialmain in di obligatoric da sport d'enviern per scolars dal stgalim aut. Il cussegl dals chantuns ha refusà ier senza discussiun la moziun da *Matthias Aebischer* (ps/BE).

Il cussegl naziunal aveva ditg gea. E da principi han ins era en il cussegl dals chantuns già simpatia per l'idea. Las classas gajan ozendi pli darar cun skis e las famiglias na possian per part betg pli finanziar il sport d'enviern, ha ditg *Géraldine Savary* (ps/VD) sco pledadra da cumissiu. «Malgrà che la moziun na para da princip betg mala, dubtain nus ch'in sulet di da sport saja nizaivel, durabel e pratitgabel.» Uschia ha la cumissiu proponì da refusar la moziun.

Era cusseglier federal Ueli Maurer ha l'emprim confermà sia simpatia e suenter tuttina supplitgà da refusar la moziun. Dumondas da scola sajan chausa dals chantuns ed ins na veglia betg intervegnir en la suveranità chantunala, ha argumentà Maurer.

La proposta da la cumissiu n'è betg vegnida cumbattida, uschia ch'il cussegl dals chantuns ha refusà la moziun senza discussiun e senza votaziun.